


Di êzîdiyatîyê de buyera ser bir û qurbana Birayîm Xelîl



29/3/2005

GIRINGIYA SERBIR Û QURBANÊ

Kemal TOLAN

Zargotinên me êzîdiyan dibêjin, wexta bedena meriv di nava axê de hate veşartin û şûnde jî ruhê meriv **namire**. Wexta ruh ji bedenê derdikeve û nikarîbe derbasî axretê bive, ew cardinê vedigere ser ruyê vê dinyayê û di nava qalib(şiklek)ekî dinê de dijî. Ji bo ruhê miriyên meriv li ser ruyê vê dinyayê zû paqij bive û biçê li axretê heta ebedî sax bimîne, divê meriv her gav li gorî mecalên xwe **zad** (hemû şiklên xwarin û vexwarinan) û **qurbanan** (*weke se jêkirina ga, çêlek, golik, gamêş, beran, mî, berx, bizin, nêrî, karik, mirîşk, şamîk-elok, qaz, ordek û whd.*) ji bo xêra(şîv û taştiya) miriyên xwe bide.

Li gorî ku ez ji baweriya me fahm dikim, qurban ne ji Xwedê tenê re têne pêşkêş kirin û ev nayê wê mahnê ku em êzîdî bi vê perestiyê hebûna Xwedê(Ezdah-Yezdan) înkâr dikin, yan jî şîrîkan ji Ezdah re çêdikin. Em êzîdî ji kevn de dibêjin, başî û nebaşiya her hêza li ser û bin erdê de tev ji ba Xwedê û milyaketan tê. Dîsa em hê ji berê ve bawer in ku her xulyaqet(giyander)ekê milyaketek wî heye. Ev milyaket, xwedan, horî, perî û cin timî bi sirên ku em evd wan nebînin dikevî nava gelek qaliban(şiklan) de digerin û her li ser ruyê dinyayê weqfî(sax in) ne. Gava ew bixawzin, ew dikarin derê gelek nebaşî û şeran bigrin, meriv ji gelek nexweşî, pîrsgirêk û teşqelên dinyayê biparêzin.

Ji ber vê baweriyê ye ku em êzîdî hêjî weke berê ji bo xwarin û vexwarina wan xwedana zad û qurbanan didin û gava em dikevî tengasiyê gaziya xwe digîhînine wan. Li gorî baweriya me, gava em ji bo xêra sax û miriyên xwe zad û qurbanan didine Xwedê, milyaket û xwedan (horî, perî-cin, xas, qelender û whd.)an, hingê qedir û rûmeta sax yan jî miriyên me jî li ba wan bilintir û nûjen dibe. Lewma hê jî em dibînin, gava merivekî êzîdî ji derdekî weke bela, teşqe, qeza, nebaşî, neqencî, zilmê, nezani, nexweşî û whd.ê xelaz dibe, ew merivên li dorûdorê dibêjinê: "Pêşiyên te zad û qurbaneke mezin dane, ketiye ber serê te û tu ji vê tengasiyê xilaz buyî."

Bi dîtina min, ev kevneşopiya serbirîna qurbanê hîna di wextê beriya buyera hazretî Birayîm Xelîl û kurê wî Simayîl de jî, di nava me êzîdiyan de bi gelek şiklan hebuye.

XXX

DÎ ZARGOTÎNA ÊZÎDIYAN DE LI SER BUYERA QURBANA BIRAYÎM XELÎL Û

KURÊ WÎ SIMAYÎL WEHA TÊ GOTÎN:

Ji xwe di dîroka hemû netewên kevnar de hatiye kifşkirin, ku hukimdarî û desthilatdariya Nemrud li ser axa Kurdistanê dest pê kiriye û derbas buye. Gelek nîşanên ku kevneşopiya Nemrud didine xwanê, vêga hêjî li Kurdistanê di nav herêma Urfayê, Melatiya û Adiyamanê li serê çiyayê Nemrud xweş xwanê ne.

XXX

Nemrud şevê di xewna xwe de buyereke ku gelekî jê tirsiyaye dîbîne û gava ji xew şiyar dibe gazî rimildarên xwe dike, dibêje wan:

"Min vêga di xewna xwe de dît ku tîrêjên şewqeke pir mezin bi ser min ve dihat. Min dikir û nedikir min nikarîbû ez xwe ji ber vê tîrêjê biparêzim. Eger hûn niha nikaribin vê xewnê ji min re şîrove bikin, an jî ez pê derxînim ku yek ji we tiştên di rimla xwe de dibîne ji min re nebêje û ji min veşêre, ez ê serê vî bibirim".

Rimaldarên Nemrud dibêjinê:

"Li gor ku em di rimla xwe de dibînin, dê ewladekî nû ji diya xwe re çêbibe û ê li dijî desthilatdariya we derkeve. Ew ê şaristanê û di nava mîletê te de gelekî bi hêz bibe, ê wusa mezin bibe ku hemû merivên li derdora te dev ji te berdin û tev bidine pey wî."

Di hinek zargotinên êzîdiyan de jî tê gotin: "Ew ê ku ji Nemrud re gotine, ne rimildar in. Ew keş(oldar)eyek buye."

Qewl dibêje:

*"Silavêt êkî bêrî ye
Keşîşekî di xewna xwe de dîtîye
Ewladek li nava şaristanê dê dahir bîye"*

Gava Nemrud van gotinan guhdarî dike, ew hîna bêtir jî ditirse û hima di cî de dibêje rimildarên xwe:

Qewl dibêje:

*"-Ya keşîşo, tû dibêjî we nabî
Ev diniya li min cema bî
Kesekî ji Nemrûdê kafir mezintir nabî"*

"Wekî wusa ye, de ka vêga li rimla xwe birênin, we kîjan jina bizarok di rimla xwe de dît, qazidekî deynine ber wê. Bila qazid birênin, dema zaroka ji jina bi hemle re çêdibe, ku kurik(lawik) be, hingê vî kurî û diya wî bihevûdinê re bikujin û nehêlin tû ewladên nû di nav desthilatdariya min de çêbibin."

Rimildar, qazid û celadên Nemrud dikevî nava mîlet, kîjan jina bihemle ye wê kifş dikin û qazidekî jî datînin berê. Gava jina gavanokekî ku xwa pîreka Xelîl e, vê buyera nebaş dibihîze, ew gelekî li ber xweha xwe (Tila) dikeve ya ku bizarok e û li wê eyan dibe ku zaroka di zikê Tilayê de kurrik e. Tebata jina gavanok hew tê û hema radibe diçe cem mala xweha xwe, jê re dibêje:

"-Tilayê xwa min, tû dizanî ez jî eva serê çend salan zewicî me û tu zarokên min çênabin. Min şeva çuyî di xewna xwe de didît, eger tu destûrê bidî min û ez rojekê li dewsa te, li ser ciyê te rûnê, ez ê jî bikaribim ber bigirim. Lewma, ez hêvî û sed racayê ji te dikim, were tu yê îro herrî li ser ciyên min rûnê û e zê jî bême dewsa te." Pîreka Xelîl bi vê hêviya xweha xwe qayîl dibe û ew ciyên xwe bi hevûdinê diguhêzin.

Rimildar hêja di beriya vê cîh guhastina xuşkan de gotibûye qazidên ku li ber jinan dimînin:

"ez di rimla xwe de rewşa jina Xelîl baş zelal nabînim. Li gorî dîtina min, eger pîreka Xelîl bi zarok be, pêwîst e zikê wê gelekî gir(mezin) bûbe. Vêca dema hûn çûn nav mala Xelîl, pêşîn li girbuna zikê jinikê birênin. Eger we dît ku zikê Tilayê ne weke min gotî wusa mezin be, dêmek jinik ne bi hemle ye û kes îî ê nebe notirvanê wê."

Çaxê qazid tîn nav mala Xelîl li weziyeta jinika rûniştî dirênin. Dibînin ku zikê jinikê qet ne wusa gir e û nava jinikê hingî zirav e ew dike bimore. Celad jî fahm dikin ku pîrek ne bi zarok e.

Di pey re celad diçin dibêjine rimildarî:

"Jinên ku me qazid danîbûn ber wan, tev zarok ji wan re çêbûne. Jina ku zaroka wê law(ewlad)bû me ew û zaroka wê herdû jî kuştin û jinên ku em wan bikujin ne man":

Încar rimildar cardinê rimila xwe davêjin û dibînin, haylo ew zaroka ku digotin, ê çêbibe, vaye hatiye ser ruyê dinyayê û dijî. Lê, dikin û nakin nikarin bibêjin ka ev papûçk(bebek) li kurê dijî.

Tila dêya papûçkê(Birayîm), ji bo ku rimildar bi ciyê zaroka wê dernexînin, diçe di nava şîkefteyekê de sêla xwe ya nan tije xwîn dike, bêjîngê datîne ser derê sêlê û papûçka xwe jî datîne ser ruyê vê bêjîngê. Ji ber vê yekê rimildara kiriye û nekiriye nikarîbûne ciyê ku zarok lê dijî baş derxînin.

XXX

Pîreka Xelîl kurê xwe Birayîm bi dizî û veşartî mezin kiriye, heta rojekê Birayîm xwe ji dayîka xwe vedidize û diçe nav zarokên heval ên xwe dileyîze. Gava Birayîm diçe nav hevalan, ew bi zarokan şad dibe û destên xwe di ser serên hevalên xwe re dibe, hingê devên hevalên wî xwar dibin û milên wan dişkên. Piştî ku ew buyer çend caran dúbare dibin û şûn de, êdî dê û bavên hevalên Birayîm diçin cem xulamên Nemrud û ew gilî li Birayîm vedikin. Nemrud ji dê û bavê Birayîm re dibêje, şîretan li ewladê xwe bikin.

Lê Birayîm bi gotina dê û bavê xwe jî nake, ji wan dipirse û dibêje:

Qewl dibêje:

*"Sibeyek ji yên xewlî ye
Birayîm Xelîl ji day û babê xwe pirsî ye
Dayê ê Xwedê di hebînin kî ye?
Sibeyek ji yên bi fûd e
Ne tehiyat hebû ne sicûd e
Yala û day babê te di hebînin bi xwe Nemrûd e
Ya dayê tu ne bêje Birayîm yî tefal e
Xwedê min ne kujit ser îmana we însalla û teál e
Îmana we pêgirtî ye betal e
Ne xêr tê hebû ne sewab e
Li axretê hemû li ser rûha we ye bi hesab e"*

Dê û bavê Birayîm diçin dibêjin Nemrudî:

"Ev kur ji me re jî dibêje, îmana ku we pê girtîye betal e. "

Nemrud dibêje qazidên xwe :

"Herin wî ewladî bê oxir bînine cem min "

Gava qazid Birayîm tînine cem Nemrud, Nemrud ji Birayîm re dibêje:

"Birayîm tû ciwan î û tû nizanî ku hukmê min ji erd heta ezman mezin e."

Birayîm jî dibêje Nemrudî :

Qewl dibêje:

*"Ya Mîro heger tu rast siltênî
Baranekê ji sayê bo min bînî"*

*Û rojê ji nîvro vegeînî
Û miryekî ji qebristanê hilînî
Ji ewê paşez dê ême ser wî dînî*

Nemrûd dibêje:

*Birayîmo ez diqarim û nakim
Baranekê ji sayê dakim
Û miryekî ji qebristanî ra kim
Û erd û ezmana firakim
Belê kesî nekiryê û ez jî nakim
Bi wî kim êkî bi mûd e
Berî wî Xaliqî bikim sicûd e
Ê distîne rûha Azir û Nemrûd e"*

Azirê bavê Birayîm cardin dibêje Nemrudî:

Qewl dibêje:

*"Ya Nemrûd ez hatîme li gel te evî weledî bikujî
Pavêjiye nava agirî bikî rejî
Hêsta dilê min pê nasojî"*

Nemrud jî dibêje dê û bavên Birayîm:

*"Wekî wusa ye, ez ê vî kurê ku gelek caran zarokên xelqê şil û şaht kirine bi cezeyê
şewtandinê, li ber çavên dê û bavên ku zarokên wan seqet bûne bavêjime nava agir û
bikujim."*

Di ser vê bîryara Nemrud dayî re, xulamên Nemrud êdî dixwazin biçine çiyê dar û çiloyê agir li ser piştê heywanan bînin. Lê, werîs û heywanan xwe nadine ber vê çûnê û ewan gotiye:

"em nikarin vî barê guhne rakin".

Gava heywan û werîs jî xwe nadine ber anîna barê dar û çilo, êdî rimildar mecbûr dibin çahreya dinê bivînin. Rimildar cardinê rimla xwe davêjin û dibêjin, erê vaye me çahre yeke dinê dît û ew jî weha ye:

"Ji bo em karibin dewsa heywanên ku xwe nadine ber anîna barê dar û çilo dagirin, divê em kerê berdine ser mihîne. Wexta mihîn bi welide, hingê hêstirê jê re çêbive û hêstirê xwe bide ber bar.

Her weha ji bo dewsa werîs jî, divê em tovê kindîrrê biçînin û dûre berê wî weke werîs dirêj bihînin."

Wextê ku hêstir mezin dibe û kindir weke werîs tê amedekirin û şûnde, êdî ew diçin barên dar û çilo tînin li bêndereke navenda Ruha yê de komdikin.

Êvarekê Birayîm Xelîl tînin, wî li nava koma dar û çilo de diçikînin û agir berdidine koma darikan. Hinga Saara keçapa Birayîm Xelîl kurapê xwe di nava pêlên agirê menceîqê de dibîne, ew jî xwe davêje nava vî agirê menceîqê.

Qewl dibêje:

*"Hezar bar da cema kirin
Pênsed sendoqên neftê lêkirin
Ji ew paşmencîq bo Sara û Birayîm ker kirin*

*Wey li xafilên bê dîn in
Wê di înin û di gêrîn in
Mencelîqê bo Sara û Birayîm dişidîn in
Mencelîq kirbû kar e
Biryîm Xelîl ji destê rûha xwe mayî bê zar e
Wey li kafîrê ênkar e
Birayîm Xelîl datînin li nav e*

Birayîm Xelîl ji destê rûha xwe mabû yî tengav e"

Birayîm Xelîl di nava pêlên agir de gaziya xwe digîne Xwedê û dibêje:

Qewl dibêje:

*"Ya rebî ez evdekî te me,
yî bê sûc, yî bê guneh, yî bê binas
tu min ji agirê Nemrûd ê kafir bikî xilas
Dê li qurbaniya te kim çiqas, tiştê li ber dilê min yî xas "*

Xwedê vê duha Birayîm Xelîl kirî qebûl dike.

*"Cibrayîlo qazidê melekê me 'bûd e
Yî bê tehiyat e yî bi sicûd e
Gotê: Cibrayî agir li Nemrûd e
Cibrayîlo qazidê melekê érşe
Dora Birayîm Xelîl kire mêrig û çîmen,
sosin û beybûnêt geşe
Kafira wa dîtibû bi çav e
Agir buhijî bûye av e
Cibrayîl û Sara û Birayîm Xelîl li nav e"*

Baraneke wusa mezin dibarîne, dike ku cihê koma dar, çilo û pêlên agir lê bilind dibû tev bive gola avê. Birayîm Xelîl û keçapa xwe Saara ji nav gola avê dertên û di tariya şevê de ji wirê dûrdibin.

Ji xwe ji hinga ev buyera pîroz qewimiye û heta vêga hê jî gelek millet û bi taybetî jî gelê kurd vî cihê buyerê ji xwe re pîroz dibînin. Çiqas belangazî û pirçibûn jî di nava xelqên li vê herêmê de hebe, hê jî tu kes nikare destê xwe bavêje wan mahsiyên di nava gola Birayîm Xelîl de û goştê wan mahsiyan naxwin.

XXX

Dema Birayîm Xelîl û keçapa xwe Saara ji herêma desthilatdariya Nemrud dûr dibin, tîne li çoleke xalî radiwestin. Ew li virê sitar(mal)ekê ji xwe re ava dikin û dûre hêja bi hevûdinê re dizewicin. Birayîm Xelîl li virê hero diçe nêçîrê, qismetê xwe û keçapa xwe tîne. Ji bo sebra Saara jî di nav malê de çêtir bê, ew cêrîyekê(bermalî) jî tîne nav mala xwe.

Hinga heft salên zewaca wan tamam dibe û zarokên wan çênabin. Der û cînar ji Birayîm Xelîl re dibêjin:

"Wekî zarok ji Saara çênabin, tû jineke din ji xwe re bîne."

Birayîm Xelîl dibêje :

"Saara keçapa min seba hezkirina min xwe avîtiye nav pêlên agirê mencenîqê û ez jî nikarim bêdiliya wê bikim."

Dema Saara bi van daxwaziyên der û cîna ra dihise û wan gotinên Birayîm Xelîl gotî dibihîze, ew radibe bi şexsê xwe ji Birayîm Xelîl re dibêje:

"Ez di bextê te de me tû yê jineke din ji xwe re bînî."

Birayîm Xelîl dîsa razî nabe û dibêje :

"Ez nikarim jineke dinê bînime ser te"

Saara dixeyîde û bela xwe ji Birayîm Xelîl venake, timî jê re dibêje heta ku ew Birayîm Xelîl razî dike. Birayîm Xelîl mecbûr dibe li ser daxwaziya keçapa xwe Saara bi bermaliya xwe Hacer re dizewice.

Wextê Birayîm bi Hacer re dizewice û şunde, êdî bi heyiya Xwedê herdû pîrekên Birayîm

bi hevre hemle dibin. Di vî wextê ku hîna zarok di zikên diya xwe de ne, **sewa** Hacer dikeve ser Birayîm û Birayîm ne bi hemda xwe zêde hirmetê dide Hacer. Saara bala xwe dide nezaketa di nava Hacer û Birayîm de her çiqas diçe zêdetir wê acis dike. Saara ji vê rûmeta wan gelekî dihefside û hew bixwe kare, radibe rojekê ji Birayîm re dibêje:

"Çima hinga Hacer ji derve tê tu ji berve radibî û hinga ez tîm tû ji ber min ve ranabî ser xwe?"

Birayîm dibêje Saara:

"Bi izzedê Xwedê, ez ne bi hemda xwe ji ber Hacer ve radibim. Ez jî carnan ji xwe re dibêjim, eger vêcarê Hacer were, ez ê ji ber ve ranebim. Lê, hinga tê ez dîsa mecbûr dibim û radibime ser xwe. Wer xwanê dike ku heyiyêke Xwedê bi vê hermetê re heye. Were ji bo ku tu ji min bawer bikî, ez û tû yê rûnên xwe bi hevûdinêve girêbidin û hinga ku Hacer ji der ve were em ê ji ber ve ranebin. "

Saara bi vî şertê Birayîm razî dibe. Rojekê hinga Hacer ji malê derketiye, Birayîm û Saara li quncikê xanî rûdinên, herdû xwe bihevûdinê ve baş girêdidin. Dema Hacer ji derve tê, dikeve devê derî herdû wusa girêdayî û bi hev re ji erdê bilind dibin û ji ber Hacer ve radibine ser piyan.

Dema Saara vê rewşa hanê bi xwe dijî, ew dibêje Birayîm:

"Ez, hew qîma xwe bi vî halî tînim. Divê, tû Hacerê ji nav mala min derxîni."

Birayîm xwe gelekî davê je ber bextê keçapa xwe Saara, lê Saara bi gotina wî nake. Hacer dibîne aremiya Birayîm di nava malê de nemaye. Gavar rojekê Birayîm ji malê dertê, Hacer radibe gelek xwarin û vexwarinê ji xwe re davêje ser piştê devê, li devê siwar dibe û ji malê dertê. Hinga ji malê dertê weha dibêje:

Qewl dibêje:

*"Beriya me ji beriya rast e
Xwedê teála nesîbê me ji vê malê veguhast e
Xwedê doste li gel dilê rast e "*

XXX

Çaxê Hacer wusa bizarok midetekê diçe û dûr dibe, êdî li çolekê dikeve ber çêbûna zarokê. Hacer dibîne ku li vê çola xur û xalî tu medeta wê tune, ew hima serê xwe bilind ke û bi dengekî bilind gaziya xwe digîne Xwedê û dibêje:

"Ya rebî tû li halê me bêyî rahmê."

Xwedê wusa hezdike, hinga zaroka Hacer (Nebî Simaîl) ji dawa diya xwe dikeve erdê, hingê di dewsa lingê wî de av dizê.

Qewl dibêje:

*"Li ber qudreta pedşê min yî akber bû
Li wê çolê li wê Kerbela yê nebî Simayîl dahir bû
Kaniya sipî li ber pêya der bû
Ew kaniya nava deştê
hinciyê nuqtek vedxiwar, sed kerem di gehîştê"*

Hacer xwe û Nebî Simayîl bi vê ava zimzimê paqij dike û ew li ser vê ava Kaniya Sipî dimînin.

XXX

Di vî wextê ku Hacer û Nebî Simayîl li ser mêrga Kaniya Sipî ne, sê bazirganê rêwîngî tevlî kerwanê xwe ve di vê çola xur û xalî de gelekî betilîne û tî bûne. Her sê bazirgan

bi hevûdinê dişewirin û dibêjinê hevûdinê:

"Ka her yekê ji me bi aliyekî ve here, kî ji me ewilî avek di deverekê de dît, bila were xeberê bide wanê dinê jî."

Yek ji wan bazirgana tê rastî vê mêrga ku Hacer û Nebî Simayîl lê dimîne dibe. Bazirgan bala xwe dide ser mêrgê, dirêne vaye jinek û papûçka xwe tenê li ber kaniyê ne. Ew qet bi jinikê re xeber nade, têra xwe avê vedixo û vedigere diçe cem hevalên xwe ji wan re dibêje:

"Min li filan deverê avek dît, li ser mêrgê tenê jinek û papûçka xwe dijîn."

Bazirganê diduya radibe diçe ser kaniyê, têr avê vedixo û li derdora xwe dirêne vaye jinek û xortek li ser mêrgê rûniştine. Bazirgan hinekî heyîrî dimîne, lê taqet nake ku tiştekê ji wan bipirse. Ew jî vedigere tê cem hevalên xwe û ji bazirganê hevalê xwe re dibêje:

"Erê, min jî têr av vexar û dît ku jinek û xortek li ser mêrgê rûniştî bûn."

Bazirganê sisêyan incar radibe diçe ser kaniyê, ew jî têr avê vedixo û li derdora xwe dirêne vaye jinek û zilamekî pîr(kal) li ser mêrgê rûniştine. Gava ew jî vedigere tê cem hevalên xwe, ji wan re dibêje:

"Erê, min jî dît ku jinek û mêrekî kal(pîr) li ser mêrgê rûniştî bûn"

Hinga gotin û dîtinên her sê bazirgana ne weke hevûdinê dertên, bi hevûdinê dikevin û dibêjin:

"Wekî her yekê ji me tiştekî dinê dibêje, werin em vê carê her sê bihevûdinê re herine ser wê mêrgê û birênin ka kî ji me rast dibêje?"

Gava hersê bazirgan bi hevûdinê re tên ser mêrgê, dirênin vaye dîsa jinek û papûçka xwe tenê li ser mêrgê ne. Êdî her sê bazirgan bawerdikin(disediqînin) ku keremetên mezin li cem vê dê û papûçka wê hene.

Dûre Nebî Simayîl û diya xwe dibêjine bazirganan:

Qewl dibêje:

"Gelî bazirgana heger hûn xatira min dibîn in

Bişînin hindî û maletê xwe bîn in

Li derê kaniyê deyn in

Bazirganî xatira nebî Simayîl we dizanî

şandina hindî maletê xwe anî

Li derê kaniyê danî

Bi rojê sê cara di çûne mala nebî Simayîl bi mêfanî"

Gava bazirgan hatine mal û miletê xwe anîne ser mêrgê û wan incar li virê xanî ji bo xwe ava kirine. Nebî Simayîl li virê mezin dibe û dizewice.

XXX

Birayîm Xelîl ji hinga Hacer ji malê çuye û pêde gelekî xema Hacerê dike. Piştî ku demeke dirêj di navre derbas dibe, ew hêja taqet dike û dibêje Saara :

"Eger tû incar destûra min bidî, ezê li pey şopa(rêça) Hacerê ve biçim. Belkî ez karibim wê bivînim û li weziyeta wê birênim."

Saara jî dibêje:

"Eger tû soz bidî min, ku te wê dît li cem wê û dimala wê de runenî, here."

Birayîm Xelîl ad(soz) dide Saara û li pey rêça Hacer diçe heta ew rastî mala wê dibe.

Dema Birayîm Xelîl tê ye ber devê deriyê mala Hacer ê, sozê dayî Saara yê tê bîra wî û ew ji ser piştê hespê peya nabe. Di vî qasî de jinikek ji nav malê dertê û Birayîm Xelîl hima li ser piştê hespê ji jinikê dipirse û dibêje ka malxoyê vê malê ne li male?

Jinik dibêje:

"Malxoyê min çûye nêvçîrê û ez nizanim ewê kengî were."

Gava jinik nabêje siwar (Birayîm Xelîl)o, de were heta malxoyê min bê keremke

peyabe û derbasî nav malê be. Birayîm Xelîl wusa siwar ji jînikê re dibêje:

"Hermet gava malxoyê te hate malê jê re bibêje, îro mêvanek hat ji ser piştê hepê peya nebû û got bibêje malxoyê xwe: 'Mal xweş mal e, lê deriyê li ber malê ne tû derî ye'."

Çaxê Nebî Simayîl ji nêçîrê hate malê, dibêje pîreka xwe:

"Hermet, ez dibêjim qey îro bîhna bavê min ji nav mala me tê?"

Jina Nebî Simayîl jê re dibêje:

"Îro siwarek hate ber deriyê me, lê hima wusa li ser piştê hespê gote min, ji malxoyê xwe re bibêje: 'Mal xweş mal e, lê deriyê li ber malê ne tû derî ye'."

Nebî Simayîl dibêje jina xwe:

"Hermet wekî wusa ye, êdî tû hew karî ji min re jinantiyê bikî, gerek tû vêga herî mala bavê xwe û min te berda."

Ev dengê gotinên Nebî Simayîl û jina wî diçe diya wî. Diya Nebî Simayîl xwe acis dike. Nebî Simayîl ji diya xwe re dibêje:

Qewl dibêje:

*"Dayê min qewî ji te şerme û fête
Her îro naqî babê min wê têtê
Lawo ev bû babê te bi serê me anî
Em derkeftin ji wî şaristanî
Kî dizane babê te yî saxe an yî bi erkanî
Ev bû
babê te li ber me kirî
Em ji wî bajêrî derkirîn
Kî dizane babê te yî saxe an yî mirî"*

Nebî Simayîl telaqê jina xwe dide destê wê û diçe jineke dinê ji xwe re tîne. Di pey re dîsa diçe nêçîra xwe. Di wê navê re Birayîm Xelîl cardin di şiklekî dinê de tê ber deriyê Nebî Simayîl û dîsa ji ser piştê hespê peyanabe û li zengilê malê dixê. Vê carê jina Nebî Simayîl ya diduyan derî vedike û ew jî nabêje Birayîm Xelîl ka were peya be.

Birayîm Xelîl wusa siwar dibêje jînikê:

"Hermet gava malxoyê te hate malê jê re bibêje, îro mêvanek hat li ser piştê hespê peya nebû û got bibêje malxoyê xwe: 'Mal xweş ma le, lê deriyê li ber malê ne tû derî ye'."

Çaxê Nebî Simayîl ji nêçîrê tê malê, dibêje pîreka xwe:

"Hermet, ez dibêjim qey îro dîsa bîhna bavê min ji nav mala me tê?"

Jina Nebî Simayîl ya diduyan jî dibêje:

"Îro siwarek hate ber deriyê me, lê hima wusa li ser piştê hespê gote min, ji malxoyê xwe re bibêje: 'Mal xweş mal e, lê deriyê li ber malê ne tû derî ye'."

Nebî Simayîl radibe jina xwe ya diduyan re jî dibêje:

"Hermet wekî wusa ye, êdî tû jî hew karî ji min re jinantiyê bikî, gerek tû jî vêga herî mala bavê xwe û min te berda."

Nebî Simayîl jina xwe ya diduyan jî berdide û diçe jineke dinê ji xwe re tîne. Di pey re ew dîsa diçe nêçîra xwe. Piştî demek diçe Birayîm Xelîl vê carê di şiklê baba derwêşekî de tê ber deriyê Nebî Simayîl û dîsa ji ser piştê hespê peya nabe û li zengilê malê dixê. Vê carê çaxê jina Nebî Simayîl ya sisêyan derî vedike, hêja gotina Birayîm Xelîl di qirika wî de û deyn nekirî, jînik dibêje:

"Ya baba derwêş tû bixêr, selamet hatî û ka were peyabe derbasî nav malê bive wexta zilamê min ji nêçîrê bê.."

Birayîm Xelîl dîsa ji ser pişta hespê peya nabe û dibêje jinikê: "keça min, ez nikarim rawestim, lê hinga zilamê te hate malê bibêje:

"Îro mêvanek hat li ber deriyê me ji ser pişta hespê peya nebû û got bibêje malxoyê xwe: "Mal xweş male û deriyê li ber malê jî pîroz be xweş deriye".

Hêja jinikê û Baba Derwêş gotina xwe xelaz nekirine, Nebî Simayîl jî tê ber malê û bavê xwe nas dike. Nebî Simayîl (*di dilê xwe de dibêje:*

"Hey babo tu xasî

Tu bi xaliqê xwe kî û libasî

esil zara û kur bab nedîtî neket nase") ew xwe ji ser pişta hespê davêje û dike here destê bavê xwe paçûke, lê ji nişka ve Emîn Cibrayîl dikeve nava wan û dibêje Birayîm Xelîl :

"Ne te sozek dabû Xwedê û divê tû vêga sozê xwe bîhnî çîh."

Qewl dibêje:

"Birayîm Xelîl wê di gurmijî

Mîna hêtûneke gerim dilê wî disojî

Kê dîtîye bab ewladî bi destê xwe bikujî"

Birayîm Xelîl li ser wahda xwe dimîne û hima di cî de hadîsa sozdahîna xwe ya ji bo Xwedê ji Nebî Simayîl re dibêje. Nebî Simayîl jî dibêje bavê xwe :

"Wekî wusa ye ez ê xwe niha li erdê dirêşkim û bila Emîn Cibrayîl jî kêrê bide stuyê min bibire."

Emîn Cibrayîl kêrê ji ber xwe datîne davêje serê Nebî Simayîl, lê dike û nake kêr serê Nebî Simayîl nabire. Radibe kêra xwe li kevir dixê, kevir dibe didû. Emîn Cibrayîl hinga dike cardinê kêrê dîsa bavê je serê Nebî Simayîl, hew dibîne ji nişkê ve beranek ji jorê ve tê xwarê û dikeve nava wî û Nebî Simayîl disekine. Li Emîn Cibrayîl eyan dibe ku Xwedê ev berana şand û dixwaze beran bikeve dewsa qurbana Birayîm Xelîl.

Emîn Cibrayîl beran serbir dike û ji wêderê diçe.

Li goriya zargotinê, hinga goştê beran dixwin û şûnde, radibin her çar hestiyê serçok(kapê)ê beran dikine serê enîşka rîknên avayê mekê û avayê tamam dikin.



Mek û Medîne ji hingê hetanî îro heye û piştî vê buyerê şûnde, êdî hêja qurban di nava gelek baweriyên mezopotamiya yê de buye semboleke netewî.

Li gorî pîvana me êzîdîyan, cejna qurbanê hersal deh rojan pêşve tê û di gere. Her êzîdiyekî ku aboriya wî dest bide yanjî çube ber mala Şêx Adî (Lalîşê) hecê, divê ew di vê roja cejna qurbanê de heywanekê serbir bike.

Çavkanî:

1. Şîrova buyerê, bira yê min Huseyîn Tolan di 23.01.2005 de ji min re got û jî dibêje: min jî ev buyera di sala 1958 de ji ber gotina seydayê xwe Feqîr Kallê girtiye.
2. Sebeqên Qewlê Birayîm Xelîl ji ber malpera http://www.lalish.com/ku_index.html hatiye girtin.

Bila xwandevan li min bibuhurin, min ji ber baweriya xwe nikarîbû bi tenê wan kêmasiyên di nivîsa qewl de hene sererast bikim.